

POSLOVNIK O RADU SKUPŠTINE ISLAMSKJE ZAJEDNICE BOŠNJAKA U ŠVEDSKOJ

Na osnovu Statuta Islamske zajednice Bošnjaka u Švedskoj, član 37, Skupština IZBUŠ-a donosi vlastiti Poslovnik o radu koji regulira ono što nije precizirano odlukama Statuta.

Član 1

Skupština treba biti legalno sazvana. Njeno sazivanje treba da se obavi na način kako je to propisano Statutom i u skladu sa općom demokratskom praksom.

Član 2

Zvanična informacija sa pozivom treba da dospje do dżemata i zastupnika najkasnije 14 dana prije održavanja skupštine. Poziv za Skupštinu treba da sadrżava jasno određen datum, vrijeme i mjesto održavanja, kao i potrebne pismene materijale koji su namijenjeni da se zastupnici pomoću njih pripreme za rad, kao i da dżemati mogu donijeti adekvatne odluke i zauzeti svoje stavove prije dolaska na Skupštinu.

Član 3

Za Skupštinu Izvršni odbor treba pripremiti pismene izvještaje o radu u proteklom periodu, kao i prijedloge plana rada, budżeta i sl.

Član 4

Utvrđivanje kvoruma se obavlja na samom početku. Pristigli zastupnici će se registrirati, njihova imena će se javno pročitati i na taj način će se javno konstatirati da je skupštinsko tijelo formirano. Prilikom konstatacije će se uvesti u zapisnik ukupan broj skupštinskih zastupnika sa pravom glasa, vodeći računa o eventualnoj promjeni prava na broj zastupnika u toku mandata Skupštine.

Dżemati koji nemaju nijednog punopravnog člana, na Skupštini mogu prisustvovati, ali bez prava glasa sve dok njihovi zastupnici ne ispune uvjete propisane Statutom i Pravilnikom o jedinstvenoj članarini i vjerskim uslugama IZBUŠ-a.

Na prvoj sjednici Skupštine u novom mandatu, koja je ujedno i konstituirajuća, na prijedlog Izborne komisije izabrat će se predsjednik Skupštine.

Član 5

Skupštinu vodi predsjednik Skupštine, uz pomoć Radnog predsjedništva koje se sastoji od aktuelnog predsjednika IZBUŠ-a, zapisničara i dva ovjerivača zapisnika koji ujedno i broje glasove.

Član 6

U zapisnik se unose samo usvojeni zaključci i odluke. Ovjerivači zapisnika imaju zadatak da pregledaju zapisnik i svojim potpisom ovjere vjerodostojnost zapisnika.

Član 7

Ovjereni zapisnik postaje zvaničan dokumenat organizacije nakon što ga potpiše predsjednik Skupštine.

Član 8

Konstatiranje uslova za održavanje skupštine vrši predsjednik, a na osnovu Statuta, čl. 22.

Član 9

Utvrdjivanje dnevnog reda. Predsjednik je dužan da pročita prijedlog dnevnog reda, eventualno ponudi određena pojašnjenja ili ponudi predlagачu da pojasni nešto u dnevnom redu ako za tim postoji potreba, a zatim da otvori raspravu povodom predloženog dnevnog reda. Prilikom rasprave predsjednik neće dopuštati rasprave o određenim pitanjima koja se nalaze u prijedlogu dnevnog reda, već samo o tome da li se određena tačka treba nalaziti na dnevnom redu skupštine ili ne. Ukoliko postoje prijedlozi za izmjene i dopune predloženog dnevnog reda, onda će prvo biti stavljeni na glasanje pojedini prijedlozi za izmjene i dopune predloženog dnevnog reda. Predsjednik zvanično konstatira koji prijedlozi su usvojeni, a koji ne.

Član 10

Skupštinski zastupnici imaju pravo u toku rada Skupštine prijedlogom staviti na glasanje i smjenjivanje predsjednika Skupštine. Takav prijedlog potrebno je da zatraži najmanje jedna trećina zastupnika. Predsjednik je dužan da takav prijedlog stavi na glasanje.

Ukoliko taj prijedlog dobije većinu prisutnih zastupnika, njegovo mjesto će zauzeti sljedeći po broju dobijenih glasova prilikom izbora predsjednika na konstituirajućoj sjednici Skupštine.

Član 11

Prilikom diskusije, svaki zastupnik u sklopu jedne tačke dnevnog reda ima pravo na jednu diskusiju od 3 minute i jednu repliku od 2 minute. Predsjednik vodi računa o kvorumu prisutnih, kao i o visini koncentracije prilikom donošenja bitnih odluka.

Član 12

Odlučivanje glasanjem može biti glasanje o odluci jednostavnog karaktera ili glasanje o odluci složenog karaktera.

Član 13

Glasanje o odluci jednostavnog karaktera se koristi onda kada se Skupština treba izjasniti o određenom prijedlogu koji je jednostavnog "da ili ne" karaktera. Predsjednik će staviti prijedlog na glasanje:

1. Ko je za ponuđeni prijedlog?
2. Ko je protiv?
3. Ko je suzdržan od glasanja?

Da bi prijedlog bio usvojen potrebno je da prilikom glasanja dobije "običnu većinu", odnosno najmanje 50% + jedan glas "za" od ukupnog broja prisutnih zastupnika. Takva većina se naziva i "prosta većina".

Član 14

Glasanje o odluci složenog karaktera je glasanje koje se primjenjuje u situaciji kada postoji dva ili više različitih prijedloga po nekom pitanju o kojem skup treba donijeti odluku. Prilikom takvog glasanja, predsjednik će ovako staviti prijedloge na glasanje:

1. Ko je za prvi prijedlog?
2. Ko je za drugi prijedlog? itd...

Nakon prebrojavanja glasova biće utvrđeno koji prijedlog je dobio najviše glasova. Broj potrebnih glasova da neki prijedlog bude usvojen ovakvim načinom glasanja nije određen procentualnom formom, već je uslovljen jedino tim da treba dobiti "relativnu većinu", odnosno barem jedan glas više od bilo kojeg drugog prijedloga. Prilikom ove vrste glasanja predsjednik neće tražiti od skupa da se izjašnjava protiv prijedloga, niti će tražiti da se skup izjasni koliko glasača je bilo suzdržano. Ukoliko prijedlozi dobiju isti broj glasova i zbog toga bude nemoguće donijeti odluku, predsjednik će ponovo otvoriti raspravu po istom pitanju. U toku rasprave je moguće da se postigne konsenzus, da neki predlagatelj odustane od svog prijedloga ili da glasačko tijelo promijeni svoje stajalište. Ako je potrebno, nakon rasprave će prijedlozi opet biti stavljeni na glasanje kako bi se donijela potrebna odluka. Ista procedura glasanja se primjenjuje i prilikom biranja nekog člana organa. Prijedlozi sa imenima kandidata će biti stavljeni na glasanje po redoslijedu njihovog predlaganja:

1. Ko je za prvopredloženi kandidata?
2. Ko je za drugopredloženi kandidata?
3. Ko je za trećepredloženi kandidata? itd...

Onaj kandidat koji dobije "relativnu većinu" glasova je izabran za novog člana organa. Ako je u Statutu na određen način reguliran izbor nekog člana organa organizacije, onda se po toj odredbi treba i postupiti prilikom glasanja.

Ako se bira između više kandidata za više mjesta u organ, npr. 3 od 5, onda se uzimaju oni prijedlozi koji su dobili najviše glasova.

Član 15

Izborna komisija predlaže najmanje duplo veći broj kandidata za sve funkcije.

Član 16

Zastupnici prilikom svog izostanka na Skupštini nemaju pravo imenovati svog zamjenika za učešće na Skupštini.

Izuzetak od ovog pravila su imami koji su članovi IO IZBUŠ-a, a njihovi džemati nemaju više imama. U tom slučaju džematska skupština će izabrati nekog drugog zastupnika umjesto tog imama.

Član 17

Skupštinski zastupnici nemaju pravo napuštati zasjedanje Skupštine bez odobrenja predsjednika Skupštine. Predsjednik će, uz pomoć zapisničara, evidentirati zastupnike koji su napustili rad Skupštine i izvršiti potrebne korekcije u skupštinskom kvorumu.

Član 18

Skupštinski zastupnici koji napuštaju rad Skupštine nemaju pravo kuvertirati svoje glasove po određenim pitanjima koja se nalaze na dnevnom redu Skupštine.

Član 19

Pravo diskusije na Skupštini imaju samo skupštinski zastupnici i članovi organa IZBUŠ-a.

Ovaj Poslovnik o radu Skupštine Islamske zajednice Bošnjaka u Švedskoj je usvojen na Skupštini, 25. februara 2006. godine. Posljednji put je dopunjen na Skupštini 23.03. 2019. i važeći je sve dok se ne izmijeni ili ne usvoji novi.

Predsjednik Skupštine:

Jönköping, 23. mart 2019.

Jasmin Fočo